

671.3901
084
16

卷廿五

人物志一之二

卷廿六

人物志二之一

重修信陽縣志
董錫賡署

重修信陽縣志卷二十五人物

人物志

古者唐虞三代建都皆在黃河南北故教澤涵濡人材薈萃西自豐鎬東迄齊魯中經陝洛鄭宋之間列聖相望百家競出其德行道誼政事文章燦著於詩書春秋戰國者可考也信陽地近南服開化較晚漢魏以降始稍有聞然有明一代大復先生學問行誼海內宗仰其詩古文辭則韓杜後不祧之宗也他如高鐵溪孟有涯之才器董重夫張季升之政績馬君卿戴仲鷗王維允之骨鯁王師竹何啓圖之忠亮李子齊錢陸石之幹濟李順卿張振猷之義烈求之漢唐亦不數覲迨及有清聲華稍遜然流風所被寬廉興起庠校相劇以道義家庭相率以禮法名臣碩儒義士賢媛雖不能如前明之多然以耳目所及二百餘年固未嘗絕生才多則甄別較嚴生才少則收錄宜廣亦作志者之通義也民國肇興風趨一變少年學子多皆抱奇氣負偉略誠能納之軌範講求實用皆邑之秀國之良也念及將來烏能不畢然高望耶志人物

乾隆志曰天地之正氣攸鍾寥寥不可多得或曠世而一見或數什伯輩而一見我申前水流長賢峯聳聳麗不惟功垂青史卓然不磨固什

皆後先輝映卽德存立巖阿孤芳自振壤而代碑名乏教人若夫賢哲輞來名遊媛遞或
迹以垂永久當表

人物志之一 照錄乾隆志

忠義 孝行 政事 耆德 文學 武功 流寓

人物志之一 一 照錄乾隆志

忠義

周春秋

彭仲爽申人仕楚爲令尹孫權謂潘濬曰彭仲爽申俘也楚文王以爲令

尹

前漢

范滂字孟博汝南人少厲清節爲州里所服時冀州饑荒盜賊羣起乃以滂爲清詔使按察之滂登車攬轡慨然有澄清天下之志及至州境守令自知賊污望風解印綬去其所舉奏莫不厭塞衆議後坐黨事繫獄獄吏謂曰凡坐繫者皆祭皋陶滂曰皋陶古之直臣知滂無罪將理之於帝如其有罪祭之何益王甫詰曰君爲人臣不忠共造部黨評論朝廷虛構無端並欲何爲滂對曰臣聞仲尼之言見善如不及見惡如探湯欲使善善同其清惡惡同其污謂王政之所願聞不悟更以爲黨乃慷慨仰天曰古之修善自求多福今之修善身陷大戮身死之日願埋滂於首陽山側上不負皇天下不愧夷齊甫愍然爲之改容

按滂邑人本非

沿已久故仍之

後漢

劉南和名邕義陽人隨先主入蜀益州既定爲江陽太守建興中稍遷至監軍後將軍賜爵關內侯卒子式嗣少子武有文與樊建齊名官亦至尙書志贊曰鎮南粗強監軍尙篤並預戎政任自封裔

傅彤義陽人仕漢爲將軍章武初從昭烈帝征吳敗於猇亭彤爲後殿兵衆盡死彤氣益烈吳人使降彤罵曰吳狗安有漢將軍而降者遂死於戰

傅僉彤之子以彤死節拜爲左中郎景耀末爲陽安關守將魏鍾會督兵至漢中使護軍胡烈攻關口僉拒守其下蔣舒率衆迎降烈乘虛襲城僉格鬪而死

魏延字文長義陽人以部曲隨先主入蜀數有戰功遷牙門將軍先主爲漢中王遷治成都當得重將以鎮漢川衆論以爲必在張飛飛亦心自許昭烈乃拔延爲督漢中鎮遠將軍領漢中太守一軍盡驚昭烈大會羣臣問延曰今委卿以重任卿居之欲云何延對曰若曹操舉天下而來請爲大王拒之偏將十萬之衆至請爲大王吞之衆咸壯其言建興元年封都亭侯丞相諸葛亮駐漢中以延爲督前部領司馬涼州刺史

八年與魏將費瑤郭淮戰於陽谿大破淮等遷爲前軍師征西大將軍假節進封南鄭侯延每隨亮出輒欲請兵萬人與亮異道會潼關如韓信故事亮制而不許延嘗謂亮爲怯歎憾己才用之不盡

晉

朱序字次倫義陽平氏人世爲名將寧康初拜梁州刺史鎮襄陽累敗苻堅都護李伯護密與賊應遂陷沒堅以爲尙書太元中苻堅南侵遣序說謝石序反謂石曰若堅百萬之衆悉到莫可與敵及其未會擊之可以得志於是石遣謝琰選勇士八千人涉淝水挑戰堅衆小卻序時在軍後呼曰堅敗衆遂大奔序乃得歸拜龍驤將軍後累功贈左將軍散

騎常侍

晉書有傳按序係義陽平氏誤人
乾隆志作義陽平氏誤人

唐

胡元範申州人武后時爲鳳閣侍郎救裴炎貶死瓊州史稱廉介有才

宋

朱修之字恭祖序之孫也元嘉中戍滑臺魏將安頡攻圍糧盡城陷太武嘉其固守之節以爲雲中鎮將妻以宗室女修之潛謀南歸妻疑之每流涕謂曰觀君無停意何不實以告我義不相負修之深嘉其義而不

告也後脫身至東萊遂以爲黃門侍郎累遷雍州刺史政在寬簡士庶悅附及南郡王義宣反檄修之舉兵雍土時饑修之僞與之同遣使陳情於孝武孝武嘉之以爲荊州刺史加都督率衆攻江陵竺超已執義宣修之至於獄殺之以功封南昌縣侯修之立身清約百城貺贈一無所受唯以蠻人宜存撫納有餉皆受得輒與佐吏賭之未嘗入己去鎮之日秋毫無犯後拜左戶部尙書加特進金紫光祿大夫卒諡貞侯

梁

張惠紹字德繼義陽人少有武幹齊明帝時爲直閣義師起歸梁高祖累有戰功高祖踐祚封石陽縣侯遷驍騎將軍時東昏餘黨作亂惠紹馳赴斬首數十級賊乃散走以功遷太子右衛率天監四年大舉北伐惠紹執城主馬成龍送京師六年魏軍攻鍾離惠紹與馮道根等攻斷魏連橋魏軍大潰以功爲持節都督冠軍將軍入爲衛尉卿出爲持節都督司州諸軍事兼刺史領安陸太守在州和理吏民親愛之徵還爲左衛將軍加通直散騎常侍卒諡曰忠

明

張琪字唯潤元季寧國人濠梁起義弟道應募屢立戰功授千戶琪獨不

求仕洪武元年舉賢良除明州知府改建廨宇作興學校躬率甲士平海寇有功授階亞中大夫力請致仕徙籍信陽泉石自娛足迹不及城市

孫顯洪武丁卯舉人卒業國子監太祖臨幸說書稱旨授工科給事中累陞工部尚書丁外艱廬墓三載鄉里推重之上嘗御闕樓睹欄楯上有紅光閃爍令人迹之則顯衣袂袍督役由此忌之會廷諍忤旨杖四十謫戍雲南密籍其家止水牛一條茅屋數間使者還報上嘉歎召復原職至中途卒於是復予八十金勅有司營葬事

葉清字源潔爲監察御史平允持正陞山西僉事景泰庚午賊入犯以清總偏頭關事時兵少賊強清募敢死士萬餘人與都督杜忠議曰朝廷厚養爾輩正爲今日予本書生願與圖報忠率驍騎於前清統勁卒於後與賊戰大破之捷聞陞參議尋轉副使卒於官

高鑑字克明信陽人武選司主事崇王之國汝寧請置守備大司馬難其事鑑曰是無難也卽移信陽守備於汝寧朝議稱便尋以事忤中貴人逮謫鎮遠通判適洞夷相讎殺督府檄鑑往輯之不服鑑夜徙居他山供帳如故遲明則臥榻已碎矣鑑從容束帶出帳中議事羣夷神之皆

叩首服遷鎮江同知夔州知府致仕鑑體貌修偉才器磊落善談辨曉音律詩書圖畫自成一家日本使臣見之歎服鑑負公輔之器不究其用至今惜之人號鐵溪先生

馮鎬字大京成化間刑部主事晉湖廣兵備平郴桂諸處洞苗上嘉其功賜豸繡二襲白金二錠巡撫畿南值逆瑾擅權諷鎬求援鎬曰此官可奪此節不可喪遂解綬歸出賜金置義田贍貧族置祭田備蒸嘗都御史唐公順之碑其事

張雲字季升襄陵知縣有惠政進給事中論逆瑾擅權下獄瑾敗獲免泣諫南幸上以忠懇不罪後以都御史提督遼東功績尤偉歷戶部尙書致仕淳雅範俗絕迹公庭卒年七十有八賜祭葬贈太子少保

何景明字仲默六歲能詩以神童稱隨父之臨洮任臨洮守李公紀奇其才授以春秋卽善說春秋歸復受尙書於兄景韶尋以尙書舉第三人時年十五諸王公大人爭迎致一見所過觀者如堵壬戌成進士授中書舍人與李夢陽邊貢薛惠輩攻古文辭振起大雅尙氣節鄙榮利並有國士之風海內皆宗尙之稱曰何李屹然爲一代山斗逆瑾用事景明移書許襄毅言大臣宜操正義以抑瑾權瑾聞而銜之謝病歸竟坐

免官瑾誅以文正李公薦復職及夢陽下江西獄又移書楊太宰爭之始得白乾清宮災應詔陳時政詆番僧義子語多激切舉朝危之錢寧欲交驩持古畫求題待命終歲卒不予一字師御史客死京邸寥鵬贈以棺景明叱卻曰吾友生不苟受奚爲受汚地下耶遂自出金賻之晉吏部員外陝西提學副使以經術世務教諸生士習文體爲之一變以病請告特旨病痊起用學使致仕起用自景明始歸日宦囊不滿三十金抵舍六日卒年三十九景明於學無所不窺天文地理律呂歷數陰陽醫卜諸家各造其妙而天才俊逸意匠圓融藝苑千秋斯爲獨步顧華玉稱其咳唾珠璣人倫之雋王元美以爲朝霞點水芙蓉試風其推尊可謂至矣自幼謙退未嘗以才凌人及論國家事當否則蹈厲憤發有萬人獨往之氣道弗合者雖隆貴人忍不與見至道藝士卽貧賤衰老尤折節下之沒齒未嘗一問家產居喪不及禫不酒不琴使滇南不持一物歸攷其行誼固蔚然醇儒不獨以詞章名世而已州故有祠汝寧太守徐公中行又立祠於府城北漆雕祠旁世稱大復先生

何景暘字仲升景明兄安慶通判時宸濠犯安慶景暘領兵捍禦勞績居

多賊平賜璽書褒賞陞右軍都督府經歷進階光祿寺少卿

孟洋字望之信陽人行人選御史迎父養京邸時權奸在位洋將彈之其父曰言必得罪叵測盍歸與爾啖蠶乎洋曰兒被罪歸一同啖蠶未晚也父笑曰此爾職吾不汝禁也書上劾張聰桂萼諸不法事果下禁獄謫桂林教授稍遷汶上知縣嘉興同知陞湖廣僉事持憲專斷不能阿人意有小拂卽日引疾去嘗與何仲默書言不宜歸者三不能仕者七嘉靖初起山東轉參議陝西參政陞右僉都御史巡撫寧夏尋改提督糧儲聞孫太恭人疾解印馳歸或以職守難之洋曰吾方寸亂矣尙能顧其他哉會總理河道之命方下值恩馳封躬捧冠帔母服之甫月餘而沒人皆頌其孝云復起爲南大理寺卿緣至五十日而卒貧無以殮僚友醵金賻之賜葬東郭外配恭人何氏卽仲默女兄洋爲行人時與仲默崔子鍾田勒甫輩揚摧風雅稱十才子所著見藝文

馬錄字君卿爲固安知縣父瑀通判武昌經固安誠之曰令職字民取譽於上而民弗拊是曰民賊惟公惟廉惟汝永念錄再拜受教在固安延父老問疾苦廉明惇信士民悅服踰年有冀寇襲破固安錄被執寇見臥內無長物乃賢而釋之獨縱去獄囚去囚曰我輩罪宜死幸無竄以累吾慈父復相率詣獄徵拜監察御史督理山東馬政宿弊盡革以內

艱歸僉憲閻公剛介寡合獨時往候錄見馬羸甚以俸易稍良者饋之錄以五不敢當辭閻公歎曰古稱一介不取君卿近之矣起按南畿時嘉靖初遣使捕高唐官屬連坐五百餘人中外大駭錄上疏諫曰先帝時動差錦衣官校四出提人天下洶洶幾壞國事幸賴陛下登極祛除舊弊人始安堵不意復有高唐之命人情且驚且疑當此新政之初恐非所宜癸未巡按陝西汚吏聞風遁去辨冤振滯關內大治旋以疾家居時信陽苦河夫之役歲倍納銀重爲民蠹特奏免之困始少舒巡撫山西妖人李福達事覺錄捕抵法初福達以丹術干武定侯郭勳勳奇之相與頗密及被繫勳移書請貫錄大怒劾勳庇奸亂法勳惶懼入辨謂錄置一家無罪人於死上震怒逮錄下錦衣獄且廷鞠錄被三木但曰臣殺妖人爲宗社計陛下明並日月察臣孤忠臣死無憾上疑以屬三法司於是刑部尙書顏頤壽都御史劉文莊大理卿湯沐等會鞠如錄擬給事中王科等御史高世魁等二十五人各又奏論勳先後十餘疏上令午門外更訊頤壽仍執前詞上曰俟朕親鞠於廷楊一清以黼辰不親獄訟乃已仍會訊之頤壽等改擬福達造妖言律上怒乃命張璁攝都察院桂萼攝刑部方獻夫攝大理寺訊於闕廷萼等私議曰聖

明偶爲近習蔽不急救致有殺直臣名乃委曲具奏而輔臣有爲錄地者從容言馬錄罪大當誅腐儒徇名一死未足爲快不若投諸遠瘴於是錄與李璋徐文華劉琦程啓允盧瓊李珏章綸等坐故入俱謫戍頤壽文莊沐與侍郎劉玉等坐推按不實俱落職王科與聶賢秦佑等坐挾私彈劾俱編氓福達釋歸勳置不問既而上諭楊一清等曰馬錄首事害人罪有所歸與其侈及後世不若誅及其身以從舜典罰弗及嗣之意一清曰錄無當死之罪律無可擬之條不宜法外用刑錄旣戍南丹講學授徒從之者如雲歷十七年以疾終年六十有八穆廟登極追贈光祿寺少卿

戴冠字仲鵬正德戊辰進士授戶部主事會上誅逆瑾沒其財產貯之豹房而錦衣官屬監局匠役皆坐食糜費宣大陝西邊餉告急冠上疏甚激切上大怒謫廣東烏石驛丞舟行直海賊擊墮水舟子提其髮出之賊復揮刃冠髮長倍身止斷其髮波流中若有人捧而濟者乃獲不死先是冠父長史誼曾涉江夜間水中鬼哭如求援者次日募探深潭得枯骸徙瘞高原復夢前鬼致謝曰終當有以報也至是人皆以爲冥報居嶺表七年當道饋遺悉拒不受亦未嘗一字報答惟時與湛文簡若

水出沒羅浮忘乎爲遷客也有薦於朝者疏云抱經濟之猷日深日大
希聖賢之道不怨不尤中外以爲非誣起潛山知縣嘉靖入繼首錄忠
諫出御批戴冠當不次擢用復戶部員外郎陞延平府知府在道改蘇
州轉山東提學副使一歲而四遷其官未任丁艱歸行李蕭然稱貸舊
知顧姓者十金爲路費服闋起寧夏兵備副使未任以疾卒年四十冠
丰姿俊灑含默不多言而遇大事乃憤爭不已平生專積書囊無長物
與王守仁李夢陽及同里何景明馬錄孟洋樊鵬爲詩文氣節之交著
述頗富多散佚世所行戴氏邃谷集未免有遺珠之憾子川貢士有詩
名能世其家學云

王納言字維允信陽人丙戌中禮闈聞父疾亟歸省登己丑科進士授戶
科給事中言時事得失直聲大震時吏部考選太常寺卿丞上以張鶚
金斌仁桑有蘭徐可成任教習雅樂讀祝禮納言上疏言太常古之秩
宗所以典神祇和上下清華重地不可廁以匪人斌仁輩本道家奴耳
異端黃冠詎可曳組鳴玉以汚廟堂銓選者不思大義致使小人得以
夤緣忤旨繫獄謫湖廣布政司照磨稍遷嘉興府通判陞山東僉事丁
外艱起陝西僉事分巡延綏稽察軍儲武弁知警以督府糧餉踰時致

軍變遂落籍歸田囊橐蕭然後遇恩詔復職以壽終

董威字重夫食貧攻苦年四十聯捷歷任魏縣邯鄲知縣俱有生祠召入浙江道御史修京都重城巡鹽兩浙奏寬沿海厲禁按貴竹調停安宣撫有功任大理民號不冤撫真定延綏招降千六百餘人尋總督川湖雲貴平叛苗韓甸等三十六處詳在平苗軍功錄

王祖嫡字胤昌父詔信陽衛指揮僉事註誤鐫世秩祖嫡以胄子舉於鄉乃上書闕下白父冤得復故爵隆慶辛未成進士改庶吉士呂文簡公嚴重之謂有忠孝大節諸吉士以事毆詈吏部掾掾走訴之部往白江陵下手劄欲分別議調黜吉士各自匿祖嫡獨前奮言詈部掾安所坐罪事尋解授檢討垂十年以內艱歸廬墓側起補原官遷國子司業上疏言革除間事請及時釐正得旨許重錄景皇帝事而建文君事姑止時論偉焉遷洗馬纂修玉牒扈從上閱壽宮賜四品大紅羅衣一襲嘗撰明因寺碑中有塗膏黷血語微以示諷偶達慈寧宮賜以寶鑑文綺佛像藥物及諸珍饌尤詞林希闊事也擢宮庶以妻喪請告歸維風正俗閭里奉爲標準詩文典贍雋永卓然名家晚逃於禪比屬續神氣條然不異平日

王延世字思延號喬峯庶子祖嫡之子年十八以祖職襲指揮使十九中本省武舉第二名本衛掌印陞嵩縣守備時陸渾山中有毛胡廬三姓倡亂延世率兵勦之躬詣賊巢置金錢於百步外貫弓執矢呼賊渠曰若能中此則任爾肆掠不則通解散賊愕視莫敢動延世一發貫錢賊遂稽顙乞命陸渾平轉遼左寧遠侯李成梁幕下參謀時有蘇八害者慄悍爲邊患延世於陣次一箭殲之一日忽失延世所在上下惶貽越三日則以三首功單騎歸蓋出塞深入也陞京營神樞佐擊將軍轉神機營以扈蹕功賜麟服陞京城內外巡捕左參將延世負文武才雅有鳴鏑天山封狼居胥意緣右文之世以武功進者多仰人鼻息遂乞骸骨年未三十急流之退人以爲難家居詩文自娛時閉戶誦佛經不問外事然當路雅重之式廬者接踵崇禎元年恩詔進階二品鎮國將軍癸酉信陽中寇患延世贊勦守禦保全之功居多在林下四十餘年七十三歲卒祀鄉賢祠好施與家無餘財見時事日艱談及君父之難輒悲憤填膺忠孝其天性也博學無不通字法右軍人爭以鵝羣寶之詩文清俊有晉唐風所著華黍堂稟餘二十卷半煨於火四子俱庠生伯子星奎生不茹葷六歲卽能詩善書稍長尤工於射論者謂於左參公

猶大令之於右軍李敢之於李廣也每抱出塵之志雖爲諸生非其好也城破後僑寓武昌再破莫知所之人或見之於匡廬云

王星璧乃延世猶子早慧讀書五行俱下留心經濟談九邊阨塞及兵馬錢糧數歷歷如指掌流寇方張以諸生參總理盧公象昇幕每出密計時闖王高某者最雄桀出潼關而東璧曰流者水也就下則免汎濫矣今誘致於江淮之間乘地狹而蹙之可盡殲也盧從之璧復曰諸路將所率皆西北兵可勿憂鳳陽總督部下皆南兵恐不任戰萬一賊回鋒鳳潁則免跳可慮耳盧不從高賊至滁州圍城且破盧統師突至城下直貫賊陣賊驚走先伏一裨帥于滁側起橫擊之賊大敗領其餘黨果犯鳳陽鳳陽兵衄槍甲積如山璧復從盧尾賊而西卒擒高賊於華陰本生謀也後從盧勤王歷觀居庸喜峯冷口之勝詩益悲壯渾古蓋得山河之助云年四十卒然爲人狷忿睚眦必報人亦以此短之

李杜字子齊真定通判駐獨石馬營蒞官廉明善拊循士卒勞問民間疾苦時出禦鹵動奄旬日鹵遽巡避去先是我兵每乘間獵鹵地鹵亦蹂躪邊地相當我衆被執者懷土來歸邊將多殺降以爲己功杜兩申請具疏嚴禁鹵衆感悅內附者日益衆偶給餉逾期士卒脫巾鼓譟撫臺